

donne bien de la consolation à ceux qui ont veu l'horreur qu'auoient ces Barbares de nostre sainte Foy, & les risées qu'ils faisoient de ceux qui la preschent. Le Diable ne laisse pas encor de donner des terreurs à quelques-vns. Ce mal-heureux esprit leur auoit persuadé que le Baptesme leur estoit fatal; qu'ils ne pouuoient quitter les coustumes de leurs Ancêtres, sans quitter la vie. Cette tromperie regne encor dans les cœurs de quelques-vns. Le Pere voulant baptiser quelques ieunes garçons de la troupe qui estoient bien instruits, & qui auoient desiré ce Sacrement, se retirèrent au point qu'on les vouloit faire Enfans de Dieu. L'vn deux retourna bien tost apres incité par ses camarades, qui le menaçoient de l'Enfer. L'autre fut plus endurcy. Je suis-mort, fait-il, si ie me fais baptiser; depuis que i'en ay eu la volonté, mon œil a commencé à me faire mal (vne fluxion luy estoit tombée sur l'vn de ses yeux.) Si ie ne suis Chrestien, c'est fait de moy, ie ne verray pas le Printemps prochain, ie mourray cét Hyuer dedans les bois, *Vnus assumetur, aliter relinquetur*: le choix & le rebut que Dieu fait des hommes est dans les tenebres, aussi bien que dans l'equité.